



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Parlamentu Nasionál
11 Setembru 2017

Prezidente Parlamentu Nasionál eleitu ba Lejizlatura 4^a promete sei fó prioridade aas ba produtividade PN durante nia-mandatu

Iha 05 Setembru 2017, Parlamentu Nasionál, liuhosi reuniaun Plenáriu hala'ó abertura ba 4^a Lejizlatura no halo mós eleisaun ba Prezidente PN foun. Plenaria halo votasaun ba kandidatu na'in rua ne'ebé kompostu hosi Dr. Aniceto Guterres ne'ebé apresenta hosi partidu sira ne'ebé konstitui koligasaun; Fretilin, PD no KHUNTO no Dr. Aderito Hugo da Costa ne'ebé apresenta hosi partidu sira opozisaun; CNRT no PLP. Rezultadu eleisaun ne'e Dr. Aniceto Guterres mak eleitu ba Prezidente Parlamentu foun ho votu afavór 33 no pakote númeru segundu hetan votu 32 hosi total deputadu ne'ebé prezente na'in 65.

Iha nia diskursu, Prezidente eleitu Aniceto Guterres promete sei sai Presidente ba Parlamentu tomak, la haree kór partidu polítiku no organizesaun hodi kontinua mantein diálogu atu rezolve diferéncia sira ne'ebé akontese, no sei lori Parlamentu Nasionál ida-ne'e sai órgaun ida ne'ebé reprezenta duni sidadun hotu iha Timor laran tomak.

Nia hatutan katak hanesan Prezidente PN sei buka maneira hotu atu hadi'a produtividade servisu Parlamentu nian liu-liu oinsa atu asegura sesaun plenária sira la'ó ho efetivu hodi bele garantia funsionamentu servisu Parlamentu nian la'ó normál no produtivu. Iha parte seluk nia mós afirma katak sei fó prioridade ba lei importante sira ne'ebé kaduka atu hamoris fila fali no hadi'a sistema atendimentu iha Parlamentu Nasionál hodi sai besik liutan ba povu no rona povu nia halerik.

“JSMP kongratula Prezidente eleitu ho nia estrutura meja tomak inklui deputadu eleitu sira ne'ebé simu ona pose no espera katak ho lideransa foun ne'ebé abitua ona ho servisu Parlamentu nian durante tinan 10 ona ne'e sei asegura hodi hadi'a di'ak liutan kualidade no produtividade servisu Parlamentu nian nomós nakloke ba ema hotu atu partisipa ativu iha prosesu lejizlasaun iha Parlamentu Nasionál”, dehan Diretór Ezekutivu JSMP, Luis de Oliveira Sampaio.

JSMP haksolok katak Prezidente Parlamentu Nasionál eleitu kompromete atu servisu ho entidades relevante sira, inklui sosiedade sivíl no mídia sira atu kontribui ba prosesu lejizlativu iha Parlamentu Nasionál.

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77295795
www.jsmp.tl
luis@jsmp.minihub.org
Facebook: www.facebook.com/timorleste.jsmp
Twitter: @JSMPtl

JSMP husu ba deputadu sira 4^a Lejizlatura nian atu la repete aktu iregularidade sira hanesan la tama servisu tuir oras servisu, halo diskusaun keta-ketak durante sesaun plenáriu sira no mós halo movimentu ba mai iha/durante diskusaun plenária no votasaun hanesan problema klásiku ne'ebé durante ne'e eziste iha Parlamentu Nasionál. Prátika sira hanesan sei hatun dignidade órgaun PN hanesan órgaun soberania Repúblika Timor-Leste ne'ebé representa Timor-oan tomak ne'ebé iha kompeténsia atu halo lei, halo fiskalizaun no desizaun polítika tuir artigu 92 Konstituisaun Repúblika. Parlamentu Nasionál tenke sai órgaun soberanu ho dignidade ne'ebé hatudu ezemplu nu'udar órgaun fiskalizadór no polítiku ne'ebé representa interese povu tomak nian.

JSMP mós husu ba deputadu foun sira no meja atu fó prioridade atu estabelese planu lejizlasaun nasional nian iha sira-nia mandatu, nune'e bele fasilita sira hodi bele halo lei tuir planu no prioridade ne'ebé iha. Aleinde ne'e, JSMP mós husu atu hamoris fila fali ka inisia fali projetu lei importánsia sira ne'ebé kaduka ona iha Parlamentu Nasionál no bele koordena fali ho Governu atu bele submete fali ba meja Parlamentu Nasionál proposta lei importante sira ka Parlamentu bele inisia fali bainhira tama iha nia kompeténsia, nune'e Parlamentu bele diskute no aprova ona lei sira ne'e iha Lejizlatura ida ne'e nia laran. Lei hirak hanesan projetu Lei Anti Korrupsaun, Proposta Lei Protesaun ba Labarik, Proposta Lei Orden ba Advogadu, no lei importánsia sira seluk ne'ebé la konsege aprova durante mandatu deputadu 3^a Lejizlatura Parlamentu Nasionál nian.

Aleinde ne'e, iha Kuarta-feira, 6 Setembru 2017, JSMP observa deputadu sira kontinua hala'oplenária extra-ordináriu hodi halo votasaun ba iha estrutura meja ne'ebé kompostu hosi Vice-presidente PN na'in rua no Sekretária meja PN. Deputadu sira ne'ebé mak eleitu ba kargu hirak ne'e mak hanesan 1^o Visepresidente Júlio Sarmiento da Costa (PD) ho 2^o Visepresidente António Verdial de Sousa (KHUNTO) no sekretaria meja Lídia Norberta dos Santos Martins (FRETILIN) ho nia nia vise sira mak hanesan Angélica da Costa (FRETILIN) ho Elvina Sousa Carvalho (PD).

Rezultadu votasaun ba pakote uníku ne'e ho votu afavór 47 kontra 8 abtensaun 10 hosi total deputadu na'in 65.

Atu hetan informasaun kle'an liu tan favór kontaktu:

Luis de Oliveira Sampaio

Diretór Ezekutivu JSMPDiresaun e-mail: luis@jsmp.tl

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

luis@jsmp.minihub.org

Facebook: www.facebook.com/timorleste.jsmp

Twitter: @JSMPtl